

摘藻堂四庫全書薈要

集部

欽定四庫全書薈要

集部

詞綜卷

二十九
三十

詳校官編修臣繆晉



欽定四庫全書薈要卷二萬八百二十七

集部

詞綜卷二十九

翰林院檢討朱彝尊編

元詞五十二首

虞集

三首

鮮于樞

一首

宋 裴

一首

劉詵

一首

曹伯啓

一首

許有壬

四首

許有孚

一首

馬熙

二首

許 楨

二首

薩都拉

四首



張翥

二十
七首

袁易
二首

沈禧
一首

洪希文
一首

楊立齋
一首

虞集

字伯生號邵菴宋相九文五世孫家崇仁以薦授大都路儒學教授累官翰林直學士兼

國子祭酒天歷中除奎章閣侍書學士卒贈江西行省中書省參知政事封仁壽郡公謚

文靖有
道園集

蘇武慢

和馮
尊師

放棹滄浪落霞殘照聊倚岸迴山轉乘鴈雙鳬斷蘆漂

輦身在畫圖秋晚雨送灘聲風搖燭影深夜尚披吟卷
算離情何必天涯咫尺路遙人遠空自笑洛下書生
襄陽耆舊夢底幾時曾見老矣浮丘賦詩明月千仞碧
天長劒雪霽瓊樓春生瑤席容我故山高宴待雞鳴日
出羅浮飛度海波清淺

又

憶昔東坡夜游赤壁孤鶴掠舟西過英雄消盡身世茫
然月小水寒星大何似漁翁不知今古醉傍蓼花燃火

夢相逢羽服翩翩未必此時非我誰解道歲晚江空
風帆目力橫梁賦詩江左清露衣裳晚風洲渚多少短
歌長些玉宇高寒故人何處渺渺予懷無那歎乘桴浮
海飄然未知誰可

風入松

寄柯敬仲

畫堂紅袖倚清酣華髮不勝簪幾回晚直金鑾殿東風
軟花裏停驂書詔許傳宮燭輕羅初試朝衫御溝冰
泮水拖藍飛燕語呢喃重重簾幕寒猶在憑誰寄銀字

泥槭報道先生歸也杏花春雨江南

鮮于樞

字伯機漁陽人官至太常典簿有困學齋集

念奴嬌

八詠樓

長溪西注似延平雙劍千年初合溪上千峯明紫翠放出羣龍頭角瀟灑雲林微茫烟草極目春洲濶城高樓迥恍然身在寥廓
我來陰雨兼旬灘聲怒起日日東風惡須待青天明月夜一試嚴維佳作風景不殊溪山信美處處堪行樂休文何事年年多病如削

宋

聚

字顯夫宛平人泰定中進士累官翰林直學士贈國子祭酒輕車都尉范陽郡侯謚文清

所著有燕石集詞一卷

浣溪沙

崑山州城西小寺

落日吳江駐畫橈招提佳處暫逍遙海風吹面酒全消

曲沼芙蓉秋的小山叢桂晚蕭蕭幾時容我夜吹

簫

顯夫聽雨賀新涼詞夢斷羅裙天如漆一寸鄉心淒楚點點是寂寥情緒明日孤舟成獨往更難堪長夜

滿湘浦亦有佳致惜全首不稱也

劉

詵

號桂翁廬陵人謚文敏有桂隱集附詞

謁金門

春睡倦自揀花枝行遍昨日新紅今日變細按將袖染
翠扇迎風撲面飛去晴絲還轉簾外楊花簾裏燕相
逢如未見

曹伯啓

字士開陽山人被薦拜西臺御史歷集賢學士引年歸天歷中召為淮東廉訪使陝西諸

道行御史臺中丞不起贈行中書左丞上護軍追封魯郡公謚文貞有漢泉漫稿詞一卷

南鄉子

四川道中作

蜀道古來難數日驅馳興已闌石棧天梯三百尺危欄

應被傍人畫裏看
兩握不曾乾
俯瞰飛流過石灘
到

晚纔知身是我
平安孤館青燈夜更寒

許有壬

字可用湯陰人延祐二年進士累官集賢大學士改樞密副使拜中書左丞卒謚文忠有

主塘小稿
詞一卷

摸魚子

和明
初韻

買陂塘旋栽楊柳歸來此是先務他鄉故里都休較舊
雨不如今雨鴻在渚笑爾尚南飛吾已安孤嶼黃花解
語道人老宜秋身安耐酒此正有真趣
鑾坡路大手

深慚燕許超騰又悖鍾呂但求閑澹如元亮不恨詩無
奇句傾綠醕底須按樂天池上霓裳譜休論往古有三
日重陽約君同醉老子築西圃

太常引

池荷

幽人早起赴池亭初日照娉婷風蓋露珠傾又勝似前
時雨聲水沉香裏錦雲深處雙檣插天青一葉釣舟
輕似野渡無人自橫

又

四隄楊柳接松筠，香破水芝新。
羅襪不生塵，笑畫裏凌波未真。
紅衣縹緲清風，蕭瑟半醉岸烏巾。
不是葛天民，也做得江湖散人。

沁園春

臨清舟中次韓伯高見贈韻寄可行

草木無情不問寒暄，開時便開。
只黃花多事，偏憐隱逸，白頭何補。
且避賢才，老友相逢，清談絕倒。
休校劉郎去後，栽尊中物，勝他年千里。
謾寄寒梅，神仙合住蓬萊。
奈老去，思兒忍不回，任景莊槐老，誰為癡夢。
梅家酒美。

且浣幽懷渭北江東暮雲春樹何日扁舟更此來公知
否便連朝觴詠能幾徘徊

許有孚

字可行官湖廣儒學副提舉歷
中憲大夫同僉太常禮儀院事

摸魚子

買陂塘旋栽楊柳不妨三月農務溪翁走報新痕漲昨
夜西山雷雨將沒渚有複徑雙洲繚繞通孤嶼黃鸝對
語正春色暄妍物華明媚好在浴沂趣天涯路芳草
茫茫如許蠻箋難寫心呂碧雲冉冉春波綠都是相思

情句花共醕似梅與山
琴臭味曾同譜堤陰樹
古要亂絮漫空柔條蘸
水慎勿折樊圃

馬

熙字明初

摸魚子

買陂塘旋栽楊柳夢中還理家務
十年不到衡山麓辜負楚雲湘雨
蘋映渚渺杜若江蘼香接烟霞嶼
口心相語為蠅驥東西雲龍上下
誤却釣游趣平生志欲識平輿二
許煌煌岳降申呂菲詞聊為先生
壽博得月章

星句毋我醕只小草幽蘭心醉離騷譜松存徑古待游
遍西園荷鋤歸去吾亦愛吾圃

太常引

和池荷韻

園中風物水中亭消得兩娉婷濁酒卷荷傾早洗盡箏
聲笛聲四隄晴柳一天花氣付與晚山青飛絮挾雲
輕任膝上瑤琴自橫

許

楨

有壬子有壬與楚人馬熙及弟有孚
倡和楨與焉共為主塘欵乃集一卷

摸魚子

買陂塘旋栽楊柳求田專理農務扁舟來往烟波裏青
筠綠蓑風雨時泛渚把遠岫遙岑收拾來孤嶼霜花笑
語道鳳閣鸞臺黃塵烏帽爭似醉鄉趣 洹溪上道士
而今誰許非熊夢斷姜呂水聲山色相縈繞湧出筆端
新句斟桂醕聽萬籟笙竽一派仙家譜休論往古何種
菊籬邊觀魚軒外晚節有秋圃

太常引

池亭荷淨納涼時四面柳依稀棹得酒船回看風裏紗

巾半欹 殘霞照水夕陽明
樹天付畫中詩應不負歸
期更誰看桃花面皮

薩都拉

字天錫鴈門人登泰定進士官京口錄事終河北廉訪司經歷

滿江紅

金陵懷古

六代豪華春去也更無消息空悵望山川形勝已非疇
昔王謝堂前雙燕子烏衣巷口曾相識聽夜深寂寞打
孤城春潮急 思往事愁如織懷故國空陳迹但荒烟
衰草亂鴉斜日玉樹歌殘秋露冷胭脂井壞寒蟬泣到

如今只有蔣山青秦淮碧

小闌干

去年人在鳳凰池銀燭夜彈絲沉水香消梨雲夢暖深
院繡簾垂今年冷落江南夜心事有誰知楊柳風柔
海棠月澹獨自倚闌時

百字令

登石
頭城

石頭城上望天低吳楚眼空無物指點六朝形勝地惟
有青山如壁蔽日旌旗連雲檣白骨紛如雪一江南

北消磨多少豪傑 寂寞避暑離宮東風輦路芳草年
年發落日無人松逕裏鬼火高低明滅歌舞尊前繁華
鏡裏暗換青青髮傷心千古秦淮一片明月

木蘭花慢

彭城懷古

古徐州形勝消磨盡幾英雄想鐵甲重瞳烏騅汗血玉
帳連空楚歌八千兵散料夢魂應不到江東空有黃河
如帶亂山迴合雲龍 漢家陵闕起秋風禾黍滿關中
更戲馬臺荒畫眉人遠燕子樓空人生百年寄耳且開

懷一飲盡千鍾回首荒城斜日倚欄目送飛鴻

張

翥

字仲舉晉寧人至正初以薦為國子助教累官河南行省平章政事兼翰林學士有蜚巖

樂府
三卷

瑞龍吟

癸丑歲冬訪游宏道樂安山中席賓
朱仁則用清真詞韻賦別和以見情

鰲溪路瀟灑翠壁丹崖古藤高樹林間猿鳥欣然故人

隱在溪山勝處

久延竚渾似種桃源裏白雲窓戶燈

前素瑟清樽開懷正好連牀夜語

應是山靈留客雪

飛風起長松掀舞誰道倦途相逢傾蓋如故陽春一曲

總是關心句何妨共磯頭把釣梅邊徐步只恐匆匆去
故園夢裏長牽別緒寂寞閒鍼縷還念我飄零江湖烟
雨斷腸歲晚客衣誰絮

多麗

西湖汎舟夕歸施成大席上
以晚山青為起句各賦一詞

晚山青一川雲樹冥冥正參差烟凝紫翠斜陽畫出南
屏館娃歸吳臺遊鹿銅仙去漢苑飛螢懷古情多憑高
望極且將尊酒慰飄零自湖上愛梅仙遠鶴夢幾時醒
空留得六橋疎柳孤嶼危亭待蘇堤歌聲散盡更須

携妓西泠藕花深雨涼翡翠菰蒲軟風弄蜻蜓澄碧生
秋闌紅駐景採菱新唱最堪聽見一片水天無際漁火兩
三星多情月為人留照未過前汀

摸魚兒

送黃任伯歸豐城時任
伯放其妾還家故及

正匆匆楚鄉秋晚孤鴻飛過南浦同來桃葉堪惆悵一
舸載春先去愁絕處問那曲闌干曾聽人低語今宵最
苦向楓樹溪橋蘆花野館剪燭臥聽雨吳霜鬢破帽
西風怎護絲絲多是離緒舊情頓冷新愁重總付墜鞭

詞譜君記取待雪夜相思乘興柴岡路唱予和汝要款
段隨車輕盈喚酒重為國香賦

又

春日西
湖泛舟

漲西湖半篙新雨麴塵波外風軟蘭舟同上鴛鴦浦天
氣嫩寒輕暖簾半捲度一縷歌雲不礙桃花扇鶯嬌燕
婉任狂客無腸王孫有恨莫放酒杯淺垂楊岸何處
紅亭翠館如今遊興全懶山容水態依然好惟有綺羅
雲散君不見歌舞地青蕪滿目成秋苑斜陽又晚正落

絮飛花將春欲去目送水天遠

又黃季景湖亭蓮花中雙頭一枝邀予
同賞而為人折去季景惘然請賦

問西湖舊家兒女香魂還又連理多情欲賦雙蕖怨閒
却滿奩秋意嬌旖旎愛照影紅妝一樣新梳洗王孫正
擬喚翠袖輕歌玉箏低按涼夜為花醉 鴛鴦浦淒斷
凌波夢裏空憐心苦絲脆吳娃小艇應偷採一道綠萍
猶碎君試記還怕是西風吹作行雲起闌干謾倚待載
酒重來尋芳已晚餘恨渺烟水

又題熊伯宣藏
梅花卷子

記西湖水邊曾見查牙老樹如此冰痕冷沁苔枝雪的
歷數花纔試天也似愛玉質清高不入閒紅紫孤山處
士謾賦得招魂烟荒水暗寂寞抱香死 春風筆休憶
深宮舊事添人多恨多思墨池雪嶺三生夢喚起縞衣
仙子仍獨自伴瘦影黃昏和月窺窓紙聲聲字字寫不
盡江南閒愁萬斛訴與綠衣使

又
元夕吳門姚子章席上同柯敬仲賦敬仲以虞
學士書風入松于羅帕作軸故末句及之楚芳

吳蘭二

妓名

記蘭臺舊時風景西樓燈火如畫嚴城月色依然好無
復綺羅遊冶歡意謝向客裏相逢還有思陶寫金樽翠
曄把錦字新聲紅牙小拍分付倦司馬 繁華夢喚起

燕嬌鶯姁肯教孤負元夜楚芳玉潤吳蘭媚一曲夕陽
西下沉醉罷君試問人生誰是無情者先生歸也但留
意江南杏花春雨和淚在羅帕

疎影

王元章
墨梅圖

山陰賦客怪幾番睡起窓影生白縹緲仙姝飛下瑤臺
淡佇東風顏色微霜却護朦朧月更漠漠暝烟低隔恨
翠禽啼處驚殘一夜夢雲無迹惟有龍煤解染數枝
入畫裏如印溪碧老樹枯苔玉暈冰園滿幅寒香狼藉
墨池雪嶺春長好悄不管小樓橫笛怕有人誤認寒花
欲點曉來妝額

解連環

留別臨川諸友

夜來風色歎青燈素被早寒欺客想寂寞人在簾櫳望

塞鴈欲來又催刀尺秋滿關河更誰倚夕陽橫笛記題
花賦月此地與君幾度遊歷江頭楚楓漸赤對愁樽
飲淚難問消息趁一舸千里東歸渺天末亂山水邊孤
驛晚晚年華悵回首雨南雲北算今古此情此恨甚時
盡得

綺羅香

雨中舟
次洹上

燕子梁深秋千院冷半濕垂楊烟縷怯試春衫長恨踏
青期阻梅子後餘潤留寒藕花外嫩涼銷暑漸驚他秋

老梧桐蕭蕭金井斷蛩暮
薰篝須待被暖催雪新詞
未穩重尋笙譜水閣雲窓總是慣曾經處曾信有客裏
關河又怎禁夜深風雨一聲聲滴在疎篷做成情味苦

喜遷鶯

瓊花

東風吹盡但一片綠陰空留春恨后土祠荒飛瓊謫又
還喜玉容堪認二十四橋夜月二十四番花信便載酒
怕芳菲易老陰晴難穩嬌困羞起晚竚立畫欄淨洗
閒脂粉沉水濃薰蜂黃淡染自有絕塵香韻也知世間

無對肯許浮花相近鳳簫遠待數枝折與玉峯人問

水龍吟

廣陵送客次鄭蘭玉賦蓼花韻

芙蓉老去妝殘露華滴盡珠盤淚水天滿灑秋容冷淡
憑誰點綴瘦葦黃邊疎蘋白外滿汀烟穩把餘妍分與
西風染就猶堪愛紅芳媚幾度臨流送遠向花前偏
驚客意船窓雨後數枝低入香零粉碎不見當年秦淮
花月竹西歌吹但此時此處叢叢滿眼伴離人醉

又

端梅

玉人梳貌堪憐曉妝一洗鉛華盡此花應是菊分顏色
梅分風韻萼點駝酥口攢金磬心凝檀粉甚女貞染就
仙衣絕勝蜂兒重驚兒嫩說與玉龍莫品怕宮波一
般流恨故人堪寄折枝代取江南春信沉水全薰藥絲
密綴額黃深暈乍燕姬未識是花是蠟笑偎人問

摘紅英

鶯聲寂鳩聲急柳烟一片梨雲濕驚人困教人恨待到
平明海棠應盡青無力紅無跡殘香賸粉那禁得天

難準晴難穩晚風又起倚闌爭忍

齊天樂

臨川夜飲滄陽
李輔之寓所

紅霜一樹淒涼葉驚鳥夜深啼落客裏相逢尊前細數
幾度雨飄風泊微吟緩酌漸月影斜欹畫欄東角只怕
梅花無人看管瘦如削江湖容易歲晚想多情念我
歸信曾約塵土狂蹤山林舊隱夢寄草堂猿鶴離懷最
惡是酒醒香殘燭寒花薄一段銷凝覺來無處著

木蘭花慢

次韻陳見心文
學孤山問梅

愛西湖千樹曾幾度為携樽向柳外停橈
苔邊待鶴酒熱詩溫瀛洲舊時月色悵荒涼
惟有數枝存天上梨花成夢江南桃葉移根
如今憔悴客愁村難返暗香魂甚歲晚春遲
角寒笛曉雪暗雲昏登臨不堪寄目但青山
隱隱月紛紛再約與君同醉從他啄木敲門

真珠簾

壽韓伯清提
舉時在平江

銀蟾半露嬋娟影西風早次第中秋天氣涼
透小簾櫳乍夜長遲睡見說靈巖山色好甚
也不濃如歸意歸未

趁西冷載酒南園尋桂 還是客裏生朝把金尊綠酒
與誰同醉烟雨隔垂虹望美人秋水桃葉妝樓團扇曲
但小草驚箋相寄傳示送白蘋一剪碧雲千里

東風第一枝

憶梅

老樹渾苔橫枝未葉青春肯誤芳約背陰未返冰魂陽
稍已含紅萼佳人寒怯誰驚起曉來梳掠是月斜花外
么禽霜冷竹間幽鶴 雲淡淡粉痕漸薄風細細凍香
又落叩門喜伴金樽倚欄怕聽畫角依稀夢裏記半面

淺窺朱箔甚時得重寫鸞箋去訪舊遊東閣

陌上花

使歸閩浙
歲暮有懷

關山夢裏歸來還又歲華催晚馬影雞聲諳盡倦郵荒
館綠箋密記多情事一看一回腸斷待殷勤寄與舊遊
鶯燕水流雲散 滿羅衫是酒香痕凝處唾碧啼紅相
半只恐梅花瘦倚夜寒誰暖不成便沒相逢日重整釵
鸞箏鴈但何郎縱有春風詞筆病懷渾懶

定風波

商角調 西江客舍酒後聞
梅花吹香滿窓醉而賦此

恨行雲特地高寒牢籠好夢不定婉晚年華淒涼客況
泥酒渾成病畫欄深碧窓靜一樹瑤花可憐影低映怕
明月照見青禽相並素衾正冷又寒香枕上薰愁醒
甚銀牀霜凍山童未起誰汲牆陰井玉笙殘錦書迴應
是多情道薄倖爭肯等閒孤負西湖春興

八聲甘州

秋日西湖泛舟午後過雨

向芙蓉湖上駐蘭舟淒涼勝遊稀但西泠橋外北山堤
畔殘柳依依追憶鶯花舊夢回首冷烟霏惟有盟鷗好

時傍人飛 聽取紅顏象板儘歌回彩扇舞換仙衣正
白蘋風急吹雨暗斜暉空惆悵離懷未展更酒邊忍又
送將歸江南客此生心事只在漁磯

滿江紅

錢舜舉桃
花折枝

前度劉郎重來訪元都燕麥回首地暗香銷盡暮雲低
碧啼鳥猶知人悵望東風不管花狼藉又淒淒紅雨夕
陽中空相憶 繁華夢渾無迹丹青筆還留得恍一枝
長見故園春色塵世事多吾欲避武陵路遠誰能覓但

有山可隱便須歸栽桃客

風入松

廣陵元夜
病中有感

東風卷陌暮寒驕燈火鬧河橋勝游憶徧錢塘夜青鸞
遠信斷難招蕙草情隨雪盡梨花夢與雲銷客懷先
自病無聊綠酒負金蕉下帷獨擁香篝睡春城外玉漏
聲遙可惜滿街明月更無人為吹簫

踏莎行

江上
送客

芳草平沙斜陽遠樹無情桃葉江頭渡醉來扶上木蘭

舟將愁不去將人去
薄劣東風天斜落絮明朝重覓
吹笙路碧雲紅雨小樓空春光已到銷魂處

露華

玉簪

瀛洲種玉總付與花神
月底深斲琢就瑤笄光映鬢雲
斜亘幾度借取搔頭別試漢宮妝束
風露冷幽香半襟
淡佇欄曲
亭亭雪艷愁獨愛粉沁冰筩鬚撚金粟石
上那回磨斷爭忍輕觸
一自楚客歸來珠履舊遊誰續
秋夢起殘妝半簪墜綠

謁金門

寒食臨川
平塘道中

溪水漫岸口小橋衝斷沽酒人家門巷短柳陰旗一半
細雨鳴鳩相喚曲港落花流滿兩兩睡紅鸂鶒暖惱
人春不管

唐多令

花下鈿莖篋尊前白雪謳記懷中朱李曾投鏡約釵盟
心已許詩寫在小紅樓忍淚上雲兜斷魂隨綵舟等
閒閒惹得離愁欲寄長河魚信去流不到白蘋洲

袁

易

字通用吳郡人有靜春詞一卷

臺城路

和師言
送春

落紅填徑東風惡貪飛燕雛歸晚聽兩樓低留春地窄
誰念閒情消滅天涯流覽正鷗渚波寬柳汀雲黯賴有
遙峯數尖遮斷送愁眼年年春草又綠看花人自老
遺恨天遠鴈柱凝塵鮫綃暗墨青鬢吳霜輕點風流漸
懶但詩惱東陽病添中散院落無人繡簾和絮捲

燭影搖紅

日日春陰瑞香亭畔寒成陣鳳鞦頻誤踏青期寂寞牆
陰冷翠被堆牀未整睡初酣風簷喚醒幾多心緒鵲語
難憑燈花無準得酒澆愁舊愁不去添新病吳綾題
滿斷腸詞歌罷何人聽寶篆香消晝永裊餘烟蕭蕭鬢
影出門長嘯白鷺雙飛清江千頃

沈

禧

字廷錫吳興人
有竹窓詞一卷

踏莎行

雜組香絨錯綜紋理倚牀脉脉如春醉沉吟暗想玉京

人雕鞍何處鳴珂里 無限離愁誰知就裏滔滔比似
西江水無情日夜向東流一緘好寄相思淚

洪希文

字汝執莆田人有續軒渠集詞一卷

浣溪沙

大室蕭條似病禪打窓風雨罷吟箋歸心一點落燈前
猶有十三樓上酒可無三百杖頭錢一年心老一年
年

楊立齋

鷓鴣天

聽楊玉娥唱故人所撰曲有感

烟柳風花錦簇筵
霜芽露葉玉裝船
誰知皓齒纖腰會
只在輕衫短帽邊
啼粉靨咽冰絃
舊遊一去更無傳
詞人彩筆佳人口
再喚春風到眼前

詞綜卷二十九

欽定四庫全書薈要卷二萬八百二十八

集部

詞綜卷三十

翰林院檢討朱彝尊編

元詞五十八首

張埜

五首

吳鎮

一首

倪瓚

五首

顧德輝

三首

陶宗儀

二首

汪斌

一首

邵亨貞

十二首

沈景高

一首

羅慶

一首

唐桂芳

一首

凌雲翰 一首

王行 三首

楊樵雲 三首

周晴川 一首

張半湖 一首

蕭東父 一首

黃水村 一首

傅按察 一首

無名氏 三首

張雨 七首

滕賓 二首

劉燕哥 一首

陳鳳儀 一首

張埜 字埜夫邯鄲人有
古山樂府二卷

水龍吟

游絲

落花天氣初晴隨風幾縷來何處飄飄冉冉悠悠颺颺
欲留還去雪繭新抽青蟲暗墜簷蛛輕度看垂虹百尺
縈迴不一似欲繫春光住憑仗何人收取付天孫雲
綃機杼浮踪浪跡忍教長伴章臺飛絮惹起閑愁織成
離恨萬千情緒望天涯盡日柔情不斷又閒庭暮

又

皇慶癸丑重九登南

高峯寄柳湯佐同知

重陽何處登臨玉驄慣識南山路秋空絕頂西風兩鬢

白雲雙屨浙浦寒潮蘓堤畫舸吳宮烟樹不一尊瓊露
數聲金縷將此景成虛負 試覓舊題詩句早爛斑雨
苔無數瓊泉寶瑟不堪重記泛觴流羽笑撚黃花間尋
紅葉故人何處倚危欄北望燕雲晝靄又征鴻暮

石州慢

紅雨西園香雪東風還又春暮當時雙槳悠悠送客綠
波南浦陽關一闋至今隱隱餘音眼前渾是分携處此
恨有誰知倚欄無語 凝竚天涯幾許離情化作暮雲

千縷過盡征鴻依舊歸期無據京塵染袂故人應念飄
零豈知翻被功名誤無處著羈愁滿春城烟雨

念奴嬌

賦白蓮用
仲殊韻

水風清暑記平湖十里寒生紈素羅襪塵輕雲冉冉鬢
鬢凌波仙女雪艷明秋瓊肌沁露香滿西陵浦蘭舟一
葉月明曾到深處誰念玉珮飄零翠房淒澹幾度相
思苦異地相看渾是夢忍把荷觴深注碧藕多絲霜莖
有刺脉脉愁烟雨江雲繚亂倚欄終日凝佇

奪錦標 七夕

涼月橫舟銀潢浸練萬里秋容如拭冉冉鸞驂鶴馭橋
倚高寒鵲飛空碧問歡情幾許早收拾新愁重織恨人
間會少離多萬古千秋今夕誰念文園病客夜色沉
沉獨抱一天岑寂忍記穿鍼亭榭金鴨香寒玉徽塵積
凭新涼半枕又依稀行雲消息聽窓前淚雨浪浪夢裏
簷聲猶滴

吳

鎮

字仲圭
嘉興人

漁父詞

題麋溪沈彥
實處士畫冊

紅葉村西日影餘
黃蘆灘畔月痕初
輕撥棹且歸與挂
起漁竿不釣魚

倪

瓚

字元鎮無錫人有清
閼閣遺稿詞一卷

人月圓

傷心莫問前朝事
重上越王臺
鷓鴣啼處東風草綠殘
照花開
悵然孤嘯青山故國
喬木蒼苔當時明月依
素影何處飛來

又

驚迴一枕當年夢
漁唱起南津
畫屏雲嶂池塘春
草無限消魂
舊家應在梧桐覆井楊柳藏門
閒身空老孤蓬
聽雨燈火江村

柳梢青

贈伎小
瑤英

樓上玉笙吹徹
白露冷飛瑤珮
玦黛淺含顰
香殘栖夢
子規啼月
揚州往事荒涼
有多少愁縈思結
燕語空津
鷗盟寒渚
畫欄飄雪

江城子

感舊

窓前翠影濕芭蕉。雨潇潇。思無聊。夢入鄉園，山水碧迢迢。
依舊當年行樂地，香徑杳，綠苔饒。沉香火底坐吹簫。
憶嬌嬈。想風標。同步芙蓉花畔，赤欄橋。漁唱一聲驚夢斷，
無處覓，不堪招。

小桃紅

一江秋水淡寒烟。水影明如練。眼底離愁數行鴈。雪晴天。
綠蘋紅蓼參差見。吳歌蕩槳一聲哀怨。驚起白鷗。

眠

顧德輝

一名阿瑛字仲瑛崑山人舉茂才署會稽教諭力辭不就後以子思封武畧將軍錢塘縣

男晚稱金粟道人

有玉山草堂集

蝶戀花

陳浩然招游觀音山宴張氏樓徐姬楚蘭佐酒以琵琶度曲郊雲臺為之心醉口占

春江暖漲桃花水畫舫珠簾載酒東風裏四面青山青

似洗白雲不斷山中起過眼韶華渾有幾玉手佳人

笑把琵琶理枉殺雲臺標外史斷腸只合江州死

青玉案

春寒惻惻春陰薄
整半月春蕭索
晴日朝來升屋角
樹頭幽鳥對調新語語
罷雙飛却紅入花腮
青入萼
盡不爽花期約
可恨狂風空自惡
曉來一陣晚來一陣
難道都吹落

清平樂

和石民瞻題
桐花道人卷

鳳簫聲度十二瑤臺
暮開遍瓊花
千萬樹
纔入謝家詩句
仙人酌我流霞夢中
知在誰家
酒醒休扶上馬
爲君一洗琵琶

陶宗儀

字九成台州人流寓松江有南村集

念奴嬌

九日有感次韻

黃花白髮又匆匆佳節感今懷昔雨覆雲翻無限態故
國寒烟榛棘杜老漂零沈郎瘦損此意天應識劃然長
嘯不知身是孤客呼酒謾撥清愁玉奴頻勸兩臉添
春色眼底生平空四海倦拂紅塵風幘戲馬臺荒登龍
人老往事休追惜山林無恙也須容我高屐

南浦

如此好溪山羨雲屏九疊波影涵素暖翠隔紅塵空明
裏著我扁舟容與高歌鼓柁鷗邊長是尋盟去頭白江
南看不了何況幾番風雨 畫圖依約天開蕩清暉別
有越中真趣孤嘯拓篷窗幽情遠都在酒瓢茶具水蒨
搖晚月明一笛潮生浦欲問漁郎無恙否回首武陵何
許

汪

斌

字以質績溪
人有雲坡集

蝶戀花

送春

芳草天涯猶未歇暗綠稀紅柳絮纔飄雪有意送春還
惜別杜鵑爭奈催歸切 繡閣無人簾半揭苦憶邊城
十載音書絕惟有東風無異說年年來趁梅花月

邵亨貞

字復孺號清溪華亭
人有蛾術詞選四卷

浣溪沙

西子湖頭三月天半篙新漲柳如烟十年不上斷橋船
百媚燕姬紅錦瑟五花宛馬紫絲鞭年年春色暗相
牽

後庭花

銅壺更漏殘紅妝春夢闌江上花無語天涯人未還倚
樓閒月明千里隔江何處山

又

刺船鸚鵡洲題詩黃鶴樓金谷銅駝夢湘雲楚水愁少
年遊好懷依舊故人還在不

凭欄人

題曹雲西
贈伎小畫

誰寫江南一段秋妝點錢塘蘇小樓樓中多少愁楚山

無盡頭

掃花遊

春晚次
南金韻

柳花巷陌悄不見銅駝采香芳侶畫樓在否幾東風怨
笛凭欄日暮一片閒情尚繞斜陽錦樹黯無語記花外
馬嘶曾送人去風景長暗度奈好夢微茫艷懷清苦
後期已誤剪燭花未卜故人来處水驛相逢待說當年
恨賦寄愁與鳳城東舊時行旅

祝英臺近

和雲西老
人秋懷韻

普天雲深夜雨幽興到何許風拍疎簾燈影逗窓戶自
從暝宿河橋露聽江笛久不記舊遊湘楚正無緒可
奈滿目清商蕭蕭五陵樹斜掩屏山腸斷庾郎賦幾回
思遶蘋花夢尋蘭棹怕驚起故溪鷗鷺

沁園春

美人
眉

巧鬪彎環纖凝嫵媚明妝未收似江亭曉望遙山拂翠
宮簾暮捲新月橫鈎掃黛嫌濃塗鉛訝淺能畫張郎不
自由傷春倦為顰多無力翻做嬌羞填來不滿橫秋

料著得人間多少愁記魚箋緘啓背人偷斂鴈鈿交併
運指輕柔有喜先占長顰難效柳葉輕黃今在不雙尖
鎖試臨鸞一展依舊風流

又目

漆點填眶鳳梢侵鬢天然俊生記隔花瞥見疎星炯炯
倚欄凝注止水盈盈端正窺簾曹騰竝枕睥睨檀郎長
是青端相久待嫣然一笑密意將成因酣曾被鶯驚
強臨鏡按抄猶未醒憶帳中親見似嫌羅密尊前相顧

翻怕燈明醉後看
承歌闌鬪弄幾度孜孜頻送情難忘
處是鮫綃溫透別淚雙零

蘭陵王

歲晚憶王
彥強作

暮天碧長是登臨望極
松江上雲冷鴈稀立盡斜陽耿
相憶凭欄起歎息人隔吳王故國
年華晚烟水正深難折梅花寄寒驛
東風舊遊歷記草暗書簾苔滿吟屐
無情征旆催離席嗟月墮寒影夜移
清漏依稀曾向夢裏識恍疑見顏色
空惜鬢毛白恨莫趁金鞍猶誤塵

跡何時弭棹蘇臺側共漉酒紗帽放歌瑤瑟春來雙燕
定到否舊巷陌

摸魚子

吳門九日次
魏彥文韻

鴈來時晚寒初勁青燈搖動窓戶商聲暗起鄰牆樹觸
景亂愁還聚秋又暮奈合造淒涼無處無笳鼓狂吟醉
舞記滿帽簪花分籌藉草騎馬忘歸路懷人遠有恨
憑誰寄語虛名長是相誤天涯節序渾非舊留得滿城
風雨心萬縷謾自喜孤高不惹沾泥絮羈懷倦訴好分

付兒曹耕鋤三徑早晚賦歸去

又
乙巳
九日

記年時滿城風雨姑蘇臺下重九客樓已辦登臨屐曾
為好山回首延佇久望翠壁嶙峋間却題詩手相逢野
叟強笑折黃花亂簪烏帽來與共尊酒 流光去肯為
閒人宿留驚心節序依舊西風只管吹蓬鬢病骨尚堪
馳驟官渡口便擬喚扁舟往問江潭柳明年健否縱世
故無情未應遲暮孤負此時候

齊天樂

甲戌清
明雨中

離歌一曲江南暮依稀灞橋回首立馬東風送人南浦
認得當年楊柳梨花過後悄不見鄰牆弄梅纖手綺陌
東頭箇人還似舊時否 相如近來病久縱腰圍暗減
猶未全瘦宿酒昏燈重門夜雨寒食清明依舊新愁謾
有第一是傷心粉銷紅溜待約明朝問舟官渡口

沈景高

烏程人

沁園春

和劉龍洲
指甲

新脫魚鱗平分鶯管愛勒眉彎記
掐恨香蕉愁慘細說
劃情嫩竹怨曲新翻纔貼梅鈿
旋挑鉛粉繡領重交猶
道寒嬌無奈笑輕拈杏帶淺揭
湘斑宮棋也學偷彈
時綰就同心羞自看解傳杯頻
賭藏闔羅袖歸鞭重數
刻印闌干暗解綃囊倦調瑤瑟
餵蕊鶯兒繡閣間凝情
處把瓜犀謾剝消遣春閒

俞焯云景高舊家子也余見此詞纖麗可愛因定交焉

羅慶

水調歌頭

遊武夷

雨晴山潑翠溪淨水拖藍閒來共陪杖屨邂逅已成三
齒齒清泉白石步步碧桃翠竹是處輒幽探行到釣臺
下怪樹蔭空潭 踏芳洲尋別館履巉巖壺天日月長
在雲氣滿東南沽得一尊濁酒喚取山花谿鳥聽我醉
中談異日再過此端為解征驂

唐桂芳

字仲寔新安人以薦授建寧路崇安縣教諭
遷南雄路儒學正學者稱白雲先生所著有

武夷
稿

水調歌頭

前題
次和

武夷最佳處晴氣碧於藍遠瞻崖壑溪曲六六與三三
莫問塵生滄海休歎鶴歸華表好景且容探鐵笛破龍
睡黑雨蒲深潭笑神仙留蛻骨閱空巖幾人蹭蹬不
遇太史滯周南最好擅場老子筆底文章如許何必事
清談暫憩桃花下白馬稅飛驒

凌雲翰

字彥翀錢塘人至正己亥登鄉試榜授紹興路蘭亭書院山長不赴退居吳興梅林村號

避俗翁有柘軒集詞一卷

蝶戀花

過雨春波浮鴨綠
草閣三間人住清
溪曲舊種小桃多
映竹亂紅遮斷松
邊屋有客抱琴穿
翠麓隔水呼舟應
是憐幽獨歷歷武
陵如在目幾時同
借仙源宿

王

行

字止仲長洲人
有半軒集詞一卷

如夢令

題雪景
便面

滿眼落花飛絮
回首瓊林玉樹
驢背是何人得了
灞橋詩句歸去
歸去春到故園深處

虞美人

顧氏
隱居

黃花翠竹臨溪處正是幽人住不嫌拄杖破蒼苔便道
有時陰雨也須來 隔簾塵土紛紛起久厭襄陽市若
能招我作西鄰從此一溪春水兩家分

又

鄒氏
隱居

白雲紅樹秋山下一片江南畫門前流水帶晴沙更是
繞籬寒菊正開花 如何眼底逢佳處偏許幽人住也
須來此結茅茨莫待有人相寄草堂資

楊樵雲

涂川
人

滿庭芳

影

只道空烟又疑流水依依却是行雲了然相對又是夢
紛紜半面春風圖畫黃金在難鑄昭君溪橋斷梅花晴
雪端的白三分 真真難喚醒三年抽藕織得榴裙甚
徘徊窺鏡交翼鸞文一片飛花來去并刀快剪取晴紋
無情處分明著眼強半滯春醺

水龍吟

夢

多情不在分明繡窓日日花陰午依依雲絮溶溶香雪

覷他尋路一滴東風怎生消得翠苞紅相被疎鐘敲斷
流鶯喚起但長記弓彎舞定是相思入骨到如今月
痕同醉教人枉了若還真箇匆匆如此全未醒鬆纈紋
生眼胡牀猶據算從前總是無憑待說與如何寄

小樓連苑

梅

一枝斜墮牆腰向人顫裊如相媚是誰剪取斷雲零玉
輕輕妝綴不是幽人如何能到水邊沙際又匆匆過了
春風半面儘長把重門閉只管相思成夢道無情又

關鄉意蒼苔半畝如今已是鹿胎田地甚欲追陪却嫌
花下翠環解語待何時月轉幽房醉了不教歸去

周晴川

程雪樓云予於近世諸家樂府惟清真犂然
當于心晴川殊有宗風雨坐空山試閱一解
便如輕衫駿騎上下五陵花發鶯啼垂楊拂
面時也

十六字令

眠月影穿窓白玉錢無人弄移過枕函邊

按十六字令即蒼梧謠也

張安國集中三首蔡伸道集中一首其首俱以一字句斷今本訛眠字為明遂作三字句斷非也是詞見天機

餘錦係周晴川作今相沿刻周美成然片玉集無此其不係美成明矣

張半湖

掃花游

柳絲曳綠正荳雨初晴水天清夏石榴綻也看猩紅萬
點倚亭欹榭瑣闥深中料想酒闌歌罷日將下是那處
藕花香勝沉麝窓外風竹打似憂玉敲金送聲瀟灑
共觀古畫喚石鼎烹茶細商幽話寶鴨烟消天外新蟾
低挂涼無價又丁東數聲簷馬

蕭東父

齊天樂

扇鷺收影驚秋晚梧桐又鳴疎雨翠箔涼多繡囊香減
陡覺簾冰如許溫存誰與更禁得荒苔露蛩相訴恨結
愁縈風刀難剪幾千縷閒思前事易遠悵舊歡無據
月墮湘浦軟玉分凋膩雲侵枕猶憶吹蘭低語如今最
苦甚怕見燈昏夢游間阻怨殺嬌癡綠窓還噀否

黃水村

解連環 春夢

鳳棲倚倦正海棠睡足錦香衾軟似不似霧閣雲牕擁
絕妙輕盈霎時曾見屏裏吳山又依約獸環半掩乍教
人覷了疑假疑真一種淒怨 游絲落花滿院料當時

錯怪杏梁歸燕謾記得栩栩多情似蝴蝶飛來撲翻輕扇
偷眼簾帷早不見畫眉人面但凝思紅生半臉枕痕一線

傅按察

鴨頭綠

錢塘懷古

靜中看記昔日淮山隱隱宛若虎踞龍盤下樊襄指揮
湘漢鞭雲騎圍繞江干勢不成三時當混一過唐之數
不為難陳橋驛孤兒寡婦久假當還挂征帆龍舟催
發紫宸初卷朝班禁庭空土花暈碧輦路悄呵喝聲乾
縱餘得西湖風景花柳亦凋殘去國三千游仙一夢依
然天淡夕陽閒昨宵也一輪明月還照臨安

無名氏

天淨沙

見老學叢談

枯藤老樹昏鴉小橋流水平沙古道淒風瘦馬夕陽西
下斷腸人在天涯

又

平沙細草斑斑曲溪流水潺潺塞上清秋早寒一聲新
鴈黃雲紅葉青山

又

西風塞上胡笳月明馬上琵琶那抵昭君怨多李陵臺
下淡烟衰草黃沙

張雨

字伯雨號貞居杭州人宋宗國公九成之裔蚤游方外居茅山自號句曲外叟

燕山亭

楊梅

鶴頂珠圓蛸肌粟聚寶葉揉藍初洗親剪翠柯遠贈筠
籠脉脉紅泉流齒骨換丹砂笑尚帶儒酸風味誰記曾
問譜西泠綠陰青子 君家幾度樽前摘天上繁星伴
人同醉纖手素盤歷亂殷紅浮沉半壺脂水珍果同時
惟醉寫來禽青李爭似為越女吳姬染指

滿江紅

玉簪次班
彥功韻

玉導纖長頓化作雲英香莢風弄影綠鬟撩亂搔頭斜
插璞小還思釵燕並叢幽畧比蕉心狹看柔鬢點綴半
開時微烘蠟冰筋瘦瓊林滑芳徑底誰偷掐怕夜涼
消得錦圍紅匝鶯管不禁仙露重蜜脾勝借清香發待
使君絕妙好詞成湏彈壓

雪獅兒

賦梅次仇
山村韻

含香弄粉便勾引游騎尋芳城南城北別有西村斷港
冰澌微綠孤山路熟伴老鶴晚先尋宿怕凍損三花兩

蕊寒泉幽谷 幾番花影濯足記歸來醉臥雪深平屋
春夢無憑鬢底鬅蟬爭撲不如圖畫相對展官奴風竹
燒黃燭一作獨自聽瓶笙調曲

蝶戀花 新柳

誰道鶯兒黃似酒對酒新鶯得似垂絲柳鉛粉泥金初
染就年年春雪消時候 一縷柔情能斷否雨重烟輕
無力縈窓牖試看溪南陰十畝落花都聚紅雲帚

早春怨

疑白石

眇得春來春寒春困陡頓無聊半別殘釭片時春夢過了元宵
空山暮暮朝朝到此際無魂可消却倚東風
水如衣帶草似裙腰

朝中措

早春書易元
九曲新居壁

草堂移住古城隈堂後水平階要結柴桑鄰里不須鷗
鷺鷺猜行廚竹裏園官菜把野老山杯說與定巢新
燕杏花開了重來

太常引

題李仁
仲畫

莫將西子比西湖千古一陶朱生怕在樓居也用著風
帆短蒲銀瓶索酒并刀斫鱸船背錦模糊堤上早傳
呼是那箇烟波釣徒

滕賓

字玉霄睢陽人官江西儒學
提舉後棄家入天台為道士

鵲橋仙

斜陽一抹青山數點萬里澄江如練蕭風吹落櫓聲遙
又喚起寒雲片片殘鴉古渡瘦驢村店漸覺樓頭人
遠桃花流水小橋東是那箇柴門半掩

齊天樂

華光閣誌別
分韻得與字

片帆呼度西山曲
匆匆載將春去路
入翠寒浪翻紅暖
一枕歌眠烟雨酒朋詩侶
儘醉舞狂歌氣吞吳楚
一樣風流依然猶是晉風度
人生如此良遇問碧翁何意
萍蓬教聚句落瑤臺香霏珠唾
驚倒世間兒女渭川雲
樹悵後夜相思玉蟾明處
怕有新詩鴈來頻寄與

劉燕哥

伎女

太常引

餞劉參議
歸山東

故人別我出陽關無計鎖雕鞍今古別離難兀誰畫蛾
眉遠山一樽別酒一聲杜宇寂寞又春殘明月小樓
間第一夜相思淚彈

陳鳳儀

成都
樂伎

一絡索

送別

蜀江春色濃如霧擁雙旌歸去海棠也似別君難一點
點啼紅雨此去馬蹄何處向沙堤新路禁林賜宴賞
花時還憶著西樓否



詞綜卷三十



總校官編修 臣朱 鈐

校對官編修 臣孫希旦

謄錄監生 臣張龍圻